



DOBOJ Akcija **SIPA-e** zbog ratnog zločina nad Bošnjacima i Hrvatima

Uhapšen zloglasni Karaga, bivši vođa 'Crvenih beretki'

Slobodan Karagić osumnjičen za silovanja maloljetnica bošnjačke nacionalnosti, za rušenje džamije, hapšenja i mučenja civila...

Pripadnici Agencije za istrage i zaštitu (**SIPA**), po nalogu Tužilaštva BiH, jučer ujutro na području Doboja uhapsili su Slobodana Karagića Karagu, osumnjičenog da je počinio teška djela ratnog zločina nad pripadnicima bošnjačke i hrvatske nacionalnosti.

Slao emisare

Zloglasni Karaga, nekadašnji vođa jedinice „Crvene beretke“, koja je u vrijeme ubistava i progona dobojskih Bošnjaka i Hrvata djelovala pod nadzorom CJB Doboja, dugo je, tvrde Dobojljije, vjerovao da će izbjeći pravdi, ubijeden da će ga zaštititi oni pod čijom je komandom tokom rata djelovao, a koji i danas važe za moćne ljude u RS.

- Trojica zločinaca Nikola Jorgić, Predrag Kujundžić i Slobodan Karagić predvodili su jedinice čiji su pripadnici u Doboju i okolici počinili najmonstruoznije zločine. Jorgić i Kujundžić izvedeni su na sud, ali se Karagić hvalio po Doboju da on nikada

neće sjesti na optuženičku klupu. Kada je saznao da je pod istragom, slao je emisare pojedinih Bošnjacima, tačnije žrtvama čije je članove porodice odvodio, silovao i ubij-

ao, tražeći da ga ne terete ako bude uhapšen, ali mu se nije posrećilo - ispričao nam je jučer Dobojljija kojeg smo sreli u Tuzli, moleći da ne otkrivamo identitet.

Karagić je, kako je saopćeno iz Tužilaštva BiH, osumnjičen za ubistvo najmanje 12 žrtava bošnjačke nacionalnosti koje su u maju 1992. godine izvedene iz zatvora „Spreča“ te odvedene u nepoznatom pravcu, a čijem je strijeljanju kao komandant jedinice „Crvene beretke“ isam prisustvovao.

Također, sumnjiči se za silovanja maloljetnica bošnjačke nacionalnosti, za rušenje džamije, hapšenja i mučenja civila, te za druga djela ratnog zločina. Sumnjiči se i za ratne zločine počinjene na području Tešića.

- Pune 23 godine čekamo da policija zakuca na Karagina vrata. Njegovim hapšenjem očekujemo da se sazna sudbina deset Bošnjaka odvedenih iz Grapske, među kojima su članovi porodice Bešić, Hidić i drugi. Karagić je bio izvršilac zločina, ali mi čekamo da se pohapse i nalogodavci, a oni i danas žive u Doboju - kazao nam je Alija Hasančević Aljo, predsjednik Udruženja logoraša Grapske.

Privatni biznis

Prema riječima Hasančevića, u Doboju je ubijeno oko 2.300 pripadnika bošnjačke i hrvatske nacionalnosti. Posmrtni ostaci mnogih od njih nisu pronađeni.

Mnoge Dobojljije odvedene su u logore, gdje su mučeni i zlostavljani na najmonstruozniji način, mnoge su žene silovane i od svih se očekuje da svjedoče u procesu protiv Karagića.

Slobodan Karagić nakon rata bavio se privatnim biznisom. U Doboju je držao kafić „Tango“, u koji su nerijetko svraćala njegova „braća pozločinu“. **A.HADŽIĆ**

Jorgić i Kujundžić osuđeni

- Rijetko se spominje da je Nikola Jorgić u Dilseldorfu, zbog zločina koje je počinio na području Doboja, osuđen za genocid i to po svih 11 tačaka optužnice, a dobio je doživotnu robiju. Predrag Kujundžić, zloglasni komandant „Predinih vukova“, u Sudu BiH osuđen je na 17 godina zatvora. Očekujemo da i Karagić dobije zasluženu kaznu za zločine koje je činio jednako kao Jorgić i Kujundžić - navodi Hasančević.



HASANČEVIĆ

Pune 23 godine čekamo



'Crvene beretke': Počinili monstruozne zločine tokom agresije na BiH